

26. august 2014

2014/67

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Napparsimavinni portørit ambulancinik ingerlatsissagunik portøritut annaassiniartartutut ilinniarsimanissaannut piumasagaateqarsinnaanissaq anguniarlugu, peqqinnissakkut upalungaarsimanermit napparsimaviullu ungataani upalungaarsimanissamut inatsisit qularnaaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Doris Jakobsen, Siumut aamma Michael Rosing, Demokraatit)

Tungavilersuut

Malittarisassat ullumikkut atuuttut naapertorlugit kalaallit nunaanni peqqinnissaqarfimmik innuttaasut orniguteqqaartarnerat piumasagaatitigut minnerpaaffeqanngilaq. Tamatta nalunngilarput nakorsanut piumasagaatit annertuujusut sivisuumillu ilinniartariaqartut aamma nakorsatut sulisoqarsinnaanngilaq eqqortumik ilinniagaqarsimannngikkaanni. Aamma taamaappoq peqqissaasut, nappaammik katsorsaasut, bioanalytikerit il.il. eqqarsaatigalugit.

Kalaallit Nunaannili tiguinnakkat peqqinnissaqarfimmi portøritut sulilersinnaapput napparsimasut peqqissuunissaannut paarinissaannullu imatut ilisimasaqanngikkaluarlutik. Taamaattoqarpoq naak portøritut annaassiniartartutut ilinniartoqarsinnaagaluartoq PI-mi. Aamma naluneqanngilaq, portørit taakkuugajuttut peqqinnissaqarfimmiit takkuteqqaartartut innuttaasut angerlarsimaffiinnut, nakorsamik peqqissaasumilluunniit ilaqaratik. Tamatuma kinguneranik portørit suliassat sulluunniit sularisariaqartarpaat, pisariaqartinneqartunik ilinniagaqanngikkaluarlutik pisinnaatitaaffeqanngikkaluarlutilluunniit.

Isumaqarpugut innuttaasut peqqinnissakkut isumannaatsuunissaat toqqissisimanissaalluunniit taamatut ingerlaannarnikkut angunaviarnagit, innuttaasup siumugaa siulleg peqqinnissaqarfimmeersoq portøriusinnaammat ilinniarsimanngitsoq.

Danmarkimi nalunaarut nr. 1150 09/11/2011-meersoq atuuppoq, tassani innuttaasut napparsimaviup ungataani pisinnaatitaaffii qularnaarneqarput. Nalunaarummi tassani ersarissumik allaaserineqarpoq Danmarkimi ambulancinik ingerlatsisartut qanoq ilinniarsimasuunissaat naatsorsuutigineqassanersoq. Naalakkersuisut § 4-mi imm. 1, § 20-mi imm. 1, § 21 aamma § 23 isumassarsiorfigisinnaalluarpaat naleqqussarlugillu kalaallit nunaanni pissutsinut portøritullu annaassiniartartutut ilinniakkamat.



Taamaattumik kissaatigaarput peqqinnissakkut upalungaarsimanermut napparsimaviullu ungataani upalungaarsimanissamut malittarisassat nutartertariaqartut naleqqussarneqarlutillu, qulakkeerumallugu innuttaasut siumortagaasa peqqinnissaqarfimmeersut portøritut ilinniarsimasuusarnissaat.

Pisortanut aningaasarsiornikkut allaffissornikkullu kingunissai

Siunnersuut akuerineqassappat siullermik inatsisit nutarternissaannut aningaasaliisoqassaaq. Aningaasartuutit taakku ilinniagartuup ukiup tallimararterutaani sulinerani aningaasartuutit amerlaqatigissavaat, ilanngullugu nutserisoqarneq, katillugit 150.000 koruunit. Aningaasartuutit taakku Naalakkersuisut allaffissornissaannut sinaakktussat akuererikkat iluanniissinnaassasut naatsorsuutigineqarpoq.

Siunnersuutip kinguneranik aningaasartuutit taggikkuminaapput, apequtaagami portøritut annaassiniartartutut ilinnialernissamut qassit tiguneqassanersut, portørinut annaassiniartartutut ilinniarnermut suut piumasqaataassanersut aamma sulisut naammattut pigineqarnersut.

Namminersortunut aningaasarsiornikkut allaffissornikkullu kingunissai

Soqanngilaq

Innuttaasunut aningaasarsiornikkut allaffissornikkullu kingunissai.

Innuttaasunut aningaasatigut allaffissornikkullu kinguneqassanngilaq. Innuttaasulli pitsaanerpaamik paarineqarnissaat qularnaarneqassaaq portørit/ambulancinik ingerlatsisut ilinniarluarsimasut sulisuusassammata napparsimaviup ungataani aallartillutik.

Peqataanik ambulancinik ingerlatsisut pillugit malittarisassat nutarternerisa kinguneranik kalaallit allamiullu napparsimasut minnerpaamik pitsaassusilimmik sullinneqartarnissaat qularnaarneqartussaavoq, nunani allani pitsaasumik sullinneqarnissamut naatsorsuuteqarnerup assiganik pitsaassusilimmik aamma napparsimasut ambulacinik aaneqarneranniik pisartussamik.